

Home > Johari za Hekima kwa Vijana > Sehemu Ya Kwanza > Balozzi wa kwanza wa Mtume (s.a.w.w.)
ni kijana: > Nafasi ya vijana katika serikali ya Imam wa zama zetu:

Sehemu Ya Kwanza

1) Nafasi Ya Kipindi Cha Ujana Katika Ustawi Kipindi Cha Ustawi Wa Maisha Thamani Yay Ujana

Mwenyezi Mungu asema:

اللَّهُ الَّذِي خَلَقَكُمْ مِنْ ضَعْفٍ ثُمَّ جَعَلَ مِنْ بَعْدِ ضَعْفٍ قُوَّةً ثُمَّ جَعَلَ مِنْ بَعْدِ قُوَّةٍ
ضَعْفًا وَشَيْبَةً ۚ يَخْلُقُ مَا يَشَاءُ ۚ وَهُوَ الْعَلِيمُ الْقَدِيرُ {54}

“Mwenyezi Mungu ndiye aliyekuumbeni katika udhaifu, na baada ya udhaifu akafanya nguvu, kisha baada ya nguvu akaufanya udhaifu na uzee, huumba apendavyo, naye ni Mjuzi Mwenye uwezo.” (Sura Rum: 54).

Akasema tena:

هُوَ الَّذِي خَلَقَكُمْ مِنْ تُرَابٍ ثُمَّ مِنْ نُطْفَةٍ ثُمَّ مِنْ عَلَقَةٍ ثُمَّ يُخْرِجُكُمْ طِفْلًا ثُمَّ لِتَبْلُغُوا
أَشُدَّكُمْ ثُمَّ لِتَكُونُوا شُيُوخًا ۚ وَمِنْكُمْ مَنْ يُتَوَقَّىٰ مِنْ قَبْلُ ۚ وَلِتَبْلُغُوا أَجَلًا مُّسَمًّى
وَلَعَلَّكُمْ تَعْقِلُونَ {67}

“Yeye ndiye aliyekuumbeni kwa udongo, kisha kwa manii, kisha kwa pande la damu, halafu akakutoeni katika hali ya mtoto mchanga, kisha ili mpate nguvu zenu kamili, kisha (akakuachen) muwe wazee, na wengine wenu hufishwa kabla (ya uzee) na ili mfikie muda uliowekwa, na ili mpate kufahamu.” (Sura Muumin/ Ghafir: 67).

Imam Ali (a.s.) amesema: “Vitu vinne thamani yake hakuna anayeijua ila watu wa namna nne: (a) Hakuna anayeijua thamani ya ujana ila wazee. (b) Hakuna anayeijua thamani ya afya ila mwenye maradhi. (c) Hakuna anayeijua thamani ya siha ila mgonjwa. (d) Hakuna anayeijua thamani ya uhai ila wafu.”¹

Imam Ali (a.s.) amesema: “Hakuna anayeijua thamani ya vitu viwili ila yule aliyevikosa: Ujana na afya.”²

Imam Ali (a.s.) amesema: “Vitu viwili lau macho mawili yatavililia kwa machozi ya damu mpaka yadondoke, bado hayatafikia uzito wake: Kupitwa na ujana na kuwakosa vipenzi.”³

Imam Ali (a.s.) amesema: “Ujana waniliza umenitoka, natamani ujana ungenirudia. Lau ujana ungekuwa unauzwa kwa lolote, basi hakika ningempa muuzaji atakacho. Lakini ujana unapoondoka kuupata ni kazi.”⁴

Kunufaika na fursa ya ujana:

Mwenyezi Mungu asema:

وَابْتَغِ فِيمَا آتَاكَ اللَّهُ الدَّارَ الْآخِرَةَ ۖ وَلَا تَنْسَ نَصِيبَكَ مِنَ الدُّنْيَا ۗ ﴿٧٧﴾

“Na utafute makazi ya Akhera yale aliyokupa Mwenyezi Mungu wala usisahau sehemu yako ya dunia.” (Surah Al-Qasas: 77).

Akasema tena:

وَهُمْ يَصْطَرِّخُونَ فِيهَا رَبَّنَا أَخْرِجْنَا نَعْمَلْ صَالِحًا غَيْرَ الَّذِي كُنَّا نَعْمَلُ ۗ أَوَلَمْ نَعْمَرْكُمْ مَا يُتَذَكَّرُ فِيهِ مِنْ تَذَكَّرٍ وَجَاءَكُمْ النَّذِيرُ ۗ فَذُوقُوا فَمَا لِلظَّالِمِينَ مِنْ نَصِيرٍ
{37}

“Na humo watapiga makelele: Mola wetu Mlezi! Tutoe (Motoni) tutafanya vitendo vizuri visivyokuwa vile tulivyokuwa tukifanya! Je, hatukukupeni umri (mwingi) akumbuke mwenye kukumbuka, na alikufikieni mwonyaji, basi onjeni, na hakuna msaidizi kwa ajili ya madhalimu.” (Surah Faatir: 37).

Mtume wa Mwenyezi Mungu (s.a.w.w.) amesema: “Ewe Ali! Vitumie vitu vinne ipasanyo kabla hujafikwa na vinne: (a) Ujana wako kabla ya utu uzima wako. (b) Siha yako kabla ya ugonjwa wako. (c) Utajiri wako kabla ya ufakiri wako. (d) Uhai wako kabla ya kifo chako.”⁵

Mtume wa Mwenyezi Mungu (s.a.w.w.) amesema: “Mja ajiandalie matumizi ya akhera yake kutoka kwenye dunia yake, na ya kifo chake toka kwenye uhai wake, na ya uzee wake toka kwenye ujana wake, kwani dunia imeumbwa kwa ajili yenu na nyinyi mmeumbwa kwa ajili ya Akhera.”⁶

Mtume wa Mwenyezi Mungu (s.a.w.w.) amesema: “Enyi watu! Hakika mna dira zitazameni dira zenu na hakika nyinyi mna kikomo tazameni kikomo chenu, kwani hakika muumini yupo baina ya vitu viwili vyenye kuogopesha: Siku iliyopita ambayo hajui Mwenyezi Mungu atamuhukumia nini humo, na siku iliyobakia hajui nini Mwenyezi Mungu atamtendea humo. Basi mja achukue toka ndani ya nafsi yake kwa ajili ya nafsi yake, na toka ndani ya dunia yake kwa ajili ya akhera yake, na toka ndani ya ujana wake kwa ajili ya uzee wake, na toka ndani ya siha yake kwa ajili ya ugonjwa wake na toka ndani ya uhai wake kwa ajili ya kifo chake. Naapa kwa Ambaye nafsi yangu imo mikononi mwake kuwa baada ya mauti hakuna mkemewaji, wala baada ya dunia hakuna nyumba ila pepo au moto.”⁷

Mtume wa Mwenyezi Mungu (s.a.w.w.) amesema: “Mambo ni rehani ya wakati wake.”⁸

Imam Ali (a.s.) amesema: “Harakisheni kutumia fursa kabla haijakuwa chungu.”⁹

Imam Ali (a.s.) amesema: “Dunia iko karibu mno na uondokaji, na uzee uko karibu mno na ujana.”¹⁰

Imam Ali (a.s.) amesema: “Hakukitendea kabisa haki kifo yule anayeian- daa kesho kwa ajili yake.”¹¹

Imam Ali (a.s.) amesema: “Itumieni fursa ya kheri, kwani bila shaka yenyewe hupita mpito wa mawinguni.”¹²

Imam Ali (a.s.) amesema kuhusu kauli ya Mwenyezi Mungu:

﴿ ۷۷ ﴾ وَلَا تَنْسَ نَصِيبَكَ مِنَ الدُّنْيَا ﴿ ۷۷ ﴾

“Wala usisahau sehemu yako ya dunia” (Surah Al-Qasas: 77)

“Usisahau siha yako, nguvu zako, faragha yako, ujana wako na fungu lako kuvitumia katika kuitafuta Akhera.”¹³

Imam As-Sadiq (a.s.) amesema kuhusu kauli ya Mwenyezi Mungu:

أَوَلَمْ نُعَمِّرْكُمْ مَا يَتَذَكَّرُ فِيهِ مَنْ تَذَكَّرَ وَجَاءَكُمْ النَّذِيرُ ﴿ ۳۷ ﴾ فَذُوقُوا فَمَا لِلظَّالِمِينَ مِنْ
نَصِيرٍ {37}

“Je, hatukukupeni umri (mwingi) akumbuke mwenye kukumbuka, na alikufikieni mwonyaji, basi

onjeni, na hakuna msaidizi kwa ajili ya madhalimu” (Surah Faatir: 37)

“Ni kumfokea kijana wa miaka kumi na nane.”¹⁴

Imepokewa ndani ya kitabu *Tanbihul-Khawatir* kuwa: “Nabii Issa (a.s.) alikuwa awakutapo vijana huwaambia: “Ni mazao mangapi hayajafikia mavuno.” Na akiwakuta wazee huwaambia: “Mazao yakishafikia (mavuno) huwa hakuna linalongojewa ila kuvunwa.”¹⁵

Hazina ya siku:

1. Mtume wa Mwenyezi Mungu (s.a.w.w.) amesema: “Siku ya Kiyama mja atafunguliwa hazina ishirini na nne, sawa na idadi ya saa za usiku na mchana za kila siku kwa idadi ya siku za umri wake, atakuta hazina moja imejaa nuru na furaha, basi atakapoishuhudia ataichukua kwa furaha ambayo lau wakigaiwa watu wa motoni basi inawashtua kwa kuwaondolea hisia za machungu ya moto. Na hiyo ndio ile saa aliyomtii ndani yake Mola wake.

Kisha atafunguliwa hazina nyingine, ataiona ikiwa na giza kali lenye kutisha, basi atakapoishuhudia ataichukua kwa uoga na mdhazaiko, kiasi kwamba lau wakigaiwa watu wa peponi neema Zake zitakuwa chungu kwao. Hiyo ndio ile saa aliyomuasi ndani yake Mola wake.

Kisha atafunguliwa hazina nyingine na kuona ikiwa tupu haina kinachomfurahisha wala kumchukiza, hiyo ndiyo ile saa aliyolala ndani yake au kujishughulisha na jambo la halali la kidunia, hapo ataichukua kwa hasara na majuto kwa kupitwa na saa hiyo, kwani alikuwa anaweza kuijaza mema yasiyohesabika. Na hii ndio kauli ya Mwenyezi Mungu:

ذٰلِكَ يَوْمُ التَّغَابُنِ ﴿٩﴾

“Hiyo ni siku ya khasara” (Surah Taghabun: 9) ¹⁶

Juhudi za dhati katika njia ya maendeleo:

Mtume wa Mwenyezi Mungu (s.a.w.w.) amesema: “Dunia ni saa moja, hivyo ifanyeni utii.”¹⁷

Imam As-Sadiq (a.s.) amesema: “Zitakayelingana sawia siku zake mbili basi kala hasara. Utakayekuwa mwisho wa siku zake ni mbaya basi ni mwenye kulaaniwa. Asiyejua nyongeza yoyote ndani ya nafsi yake basi yuko karibu mno na upungufu. Na atakayekuwa karibu mno na upungufu basi kifo kwake ni bora kuliko uhai.”¹⁸

Kutathmini siku za ujana:

Mtume wa Mwenyezi Mungu (s.a.w.w.) amesema: “Hautanyanyuka unyayo wa mja mbele ya Mola wake

siku ya Kiyama mpaka aulizwe kuhusu mambo matano: (a) Umri wake ameutumia katika kitu gani. (b) Ujana wake ameutumia katika kitu gani. (c) Mali yake aliipata vipi (d) Na aliitumia vipi. (e) Na alifanya nini kuhusu yale aliyokuwa na elimu nayo.”¹⁹

Mtume wa Mwenyezi Mungu amesema: “Hautanyanyuka unyayo wa mja mbele ya Mola wake siku ya Kiyama mpaka aulizwe kuhusu mambo manne: : (a)Umri wake ameutumia katika kitu gani. (b) Ujana wake ameutumia katika kitu gani. (c) Mali yake aliipata vipi. (d) Na aliitumia vipi. (e) Na kuhusu mapenzi yetu Ahlul-Bait.”²⁰

Imam As-Sadiq (a.s.) amesema: “Miongoni mwa mawaidha ya Luqman (a.s.) kwa mwanae ni: ‘Jua hakika wewe kesho utaulizwa mambo manne pindi utakaposimama mbele ya Mwenyezi Mungu: (a) Ujana wako umeutumia katika kitu gani. (b) Umri wako ameutumia katika kitu gani. (c) Mali yako uliipata vipi. (d) Na uliitumia vipi. Basi jiandae kwa hilo na liandalie majibu.”²¹

2) Ustawi Katika Kujijenga

Utayarifu wa kijana katika kujijenga kiroho na kimwili:

Mtume wa Mwenyezi Mungu (s.a.w.w.) amesema: “Nawausia kheri kwa vijana, kwani hakika wao ni wenye vifua vyepesi, Mwenyezi Mungu alin-ituma niwe mbashiri na muonyaji, vijana wakaniunga mkono, na wazee wakanipinga”. Kisha akasoma kauli ya Mwenyezi Mungu

“Na muda wao ukawa mrefu, kwa hivyo nyoyo zao zikawa ngumu..” (Surah Yunus: 83).²²

Imesemwa ndani ya *Tafsiri Al-Qummiy* kuhusu kauli ya Mwenyezi Mungu:

وَعَجِبُوا أَنْ جَاءَهُمْ مُنْذِرٌ مِنْهُمْ ۗ {4}

“Na walishangaa kwa kuwafikia mwonyaji anayetokana nao....” (Surah Swad: 4):

Iliteremka Makka pindi Mtume wa Mwenyezi Mungu (s.a.w.w.) alipodhihirisha Uislam, kwani makurayshi walijikusanya kwa Abu Talib na kumwambia: “Ewe Abu Talib! Bila shaka mwana wa ndugu yako kachafua ndoto zetu, katukana miungu yetu, kawaharibu vijana wetu na kavunja umoja wetu, basi ikiwa linalomsababisha kufanya hivyo ni ukata, sisi tutamkusanyia mali na kummilikisha mpaka awe mtu tajiri kuliko sisi”. Basi Abu Talib akampa habari kuhusu hilo, akasema: “Wallahi lau wakiweka jua mkono wangu wa kushoto na mwezi mkono wangu wa kulia, sintoitaka (mali hiyo).”²³

Imam Ali (a.s.) amesema: “Akili na upumbavu huendelea kumgombania mtu mpaka afikishapo miaka kumi na nane, akiifikia ndipo lenye nguvu zaidi kati ya hayo mawili hushinda.”²⁴

Imam As-Sadiq (a.s.) amesema: “Ewe mwana wa ndugu yangu! Shikamana na vijana na achana na wazee.”²⁵

Imepokewa ndani ya kitabu *Al-Kafiy* kutoka kwa Ismail bin Abdul-Khaliq amesema: “Abu Abdillah (a.s.) alimwambia Abu Jafar Al-Ahwal nami nikiwa nasikia: ‘Je, umekwenda Basra?’ Akajibu ndio. Akasema: ‘Umeonaje watu wanavyoharakisha kuingia na kulikubali jambo hili?’ Akasema: ‘Wallahi hakika ni wachache waliofanya hivyo, na hakika hilo ni kwa uchache.’ Akasema: ‘Shikamana na vijana, kwani hakika wao ni wepesi wa kuelekea kila kheri.’²⁶’

Imepokeawa ndani ya kitabu *Ilalus-Sharaiu* kutoka kwa Ismail bin Al-Fadhlu Al-Hashimiy amesema: “Nilimwambia Jafar bin Muhammad (a.s.), nipe habari kuhusu Yaqub (a.s.) pindi wanae walipomwambia:

قَالُوا يَا أَبَانَا اسْتَغْفِرْ لَنَا ذُنُوبَنَا إِنَّا كُنَّا خَاطِئِينَ {97}

قَالَ سَوْفَ أَسْتَغْفِرُ لَكُمْ رَبِّي ۗ إِنَّهُ هُوَ الْغَفُورُ الرَّحِيمُ {98}

“...Ewe baba yetu! Tuombe msamaha kwa dhambi zetu, hakika sisi tulikuwa wenye makosa.” Akasema: Nitakuombeeni msamaha kwa Mola wangu Mlezi, kwani Yeye ndiye Mwingi wa kusamehe, Mwenye kurehemu” (Surah Yusuf: 97-98).

Akawa amechelewesha msamaha wao. Lakini Yusuf (a.s.) walipomwambia:

قَالُوا تَاللَّهِ لَقَدْ أَثَرَكَ اللَّهُ عَلَيْنَا وَإِن كُنَّا لَخَاطِئِينَ {91}

قَالَ لَا تَثْرِبَ عَلَيْكُمُ الْيَوْمَ ۗ يَغْفِرُ اللَّهُ لَكُمْ ۗ وَهُوَ أَرْحَمُ الرَّاحِمِينَ {92}

“Wakasema: Wallahi bila shaka Mwenyezi Mungu amekufadhilisha kuliko sisi, na hakika sisi tulikuwa wenye makosa. Akasema: Hakuna lawama juu yenu leo, Mwenyezi Mungu atakusameheni, naye ni Mwenye rehema zaidi kuliko wanaorehemu.” (Surah Yusuf: 91 - 92).

Akawaharakishia. Imam (a.s.) akasema: ‘Kwa sababu moyo wa kijana ni mwepesi kuliko moyo wa mzee, na jinai la watoto wa Yaqub lilikuwa ni dhidi ya Yusuf, na jinai yao dhidi ya Yaqub ni kwa kuwa walimfanyia jinai Yusuf, hivyo Yusuf akaharakisha kusamahe haki yake, na Yaqub akachelewesha

msamaha, kwa sababu kusamehe kwake kulikuwa ni kusamehe haki ya mwingine, hivyo akachelewesha msamaha mpaka usiku wa Ijumaa.”²⁷

Nafasi ya vijana katika kujelimisha:

Mtume wa Mwenyezi Mungu (s.a.w.w.) amesema: “Atakayejifunza ujanani inakuwa kama nakshi kwenye jiwe. Na atakayejifunza ukubwani inakuwa kama kitabu juu ya maji.”²⁸

Imam Ali (a.s.) amesema: “Jielimisheni mkingali wadogo itawanufaisheni ukubwani.”²⁹

Imam Ali (a.s.) amesema: “Asiyeibidisha nafsi yake udogoni basi hatopevuka kiakili ukubwani.”³⁰

Imam Ali (a.s.) amesema: “Upiteni ujana kwa midahalo na mijadala. Utu uzima kwa tafakari na uzee kwa ukimya.”³¹

Imam Al-Baqir (a.s.) amesema: “Baba yangu mpendwa Zaynul-Abidiin alikuwa awaonapo vijana wanaotafuta elimu huwasogeza kwake na kuwaambia: “Karibuni! Ninyi ni hazina ya elimu, ninyi leo ni wadogo wa wengine, na mnakaribia kuwa wakubwa wa wengine.”³²

Imam As-Sadiq (a.s.) amesema: “Sipendi kumwona kijana miongoni mwenu ila akiwa amezama katika hali mbili: Ima msomi au mwenye kujelimisha, na kama hatofanya hivyo basi kavuka mipaka, na akivuka mipaka kapoteza, na akipoteza katenda dhambi, na akitenda dhambi kaishi motoni. Naapa kwa yule aliyempa unabii Muhammad (s.a.w.w.) kwa haki.”³³

Mafunzo ya kiroho:

Imam Ali (a.s.) amesema: “Hakika moyo wa kijana ni sawa na ardhi tupu, chochote kitachopandwa humo hukipokea, hivyo harakisha kujifunza adabu kabla moyo wako haujasusuka.”³⁴

Imam Ali (a.s.) amesema alipokuwa akimuusia mwanae Imam Hasan (a.s.): “Na nikakusanya adabu yako ili uwe nayo ungali na umri mdogo, wenye akili, ukiwa na nia salama na nafsi safi.”³⁵

Imam Zaynul-Abidiin (a.s.) amesema: “Mtume wa Mwenyezi Mungu (s.a.w.w.) aliwakuta watu wakiinua jiwe, akawaambia: ‘Kazi gani hii?’ Wakamjibu: ‘Tunataka kwayo tumjue ni nani mwenye nguvu kati yetu.’

Akasema (s.a.w.w.): ‘Je, niwaambieni ni nani mwenye nguvu kati yenu?’ Wakasema ndio ewe Mtume wa Mwenyezi Mungu. Akasema (s.a.w.w.):

‘Mwenye nguvu kati yenu ni yule ambaye anaporidhia ridhaa yake haimwingizi katika dhambi wala batili. Anapokasirika kukasirika kwake hakumzuii kusema haki, na anapokuwa na uwezo hatoi kisichokuwa haki.’³⁶

Manabii (a.s.) walitumwa wakiwa vijana:

Mwenyezi Mungu amesema:

قَالُوا سَمِعْنَا فَتًى يَذُكُرُهُمْ يُقَالُ لَهُ إِبْرَاهِيمُ {60}

“Wakasema: Tulimsikia kijana mmoja akiwataja anaitwa Ibrahim.” (Surah Anbiyai: 60).

Akasema tena:

وَلَمَّا بَلَغَ أَشُدَّهُ وَاسْتَوَىٰ آتَيْنَاهُ حُكْمًا وَعِلْمًا ۗ وَكَذَٰلِكَ نَجْزِي الْمُحْسِنِينَ {14}

“Na alipofika (Musa) balebhe yake na akastawi, tulimpa hukumu na elimu na hivyo ndivyo tunavyowalipa watendao mema.” (Surah Al- Qasas: 14).

Na amesema:

وَلَمَّا بَلَغَ أَشُدَّهُ آتَيْنَاهُ حُكْمًا وَعِلْمًا ۗ وَكَذَٰلِكَ نَجْزِي الْمُحْسِنِينَ {22}

“Na alipofika (Yusuf) balebhe yake, tulimpa hukumu na elimu na hivyo ndivyo tunavyowalipa watendao mema.” (Surah Yusuf: 22).

Imam As-Sadiq (a.s.) amesema kuhusu kauli ya Mwenyezi Mungu:

“Na alipofika (Musa) balebhe yake na akastawi, tulimpa hukumu na elimu”: “Na alipofika (Musa) balebhe yake, yaani miaka kumi na nane. Na akastawi, yaani alipoota ndevu.”³⁷

Mtume wa Mwenyezi Mungu (s.a.w.w.) amesema: “Mwenyezi Mungu hakumtuma Nabii yeyote ila alikuwa ni kijana.”³⁸

Mtume wa Mwenyezi Mungu (s.a.w.w.) amesema: “Mwenyezi Mungu hakumtuma Nabii yeyote ila alikuwa ni kijana, na msomi hakupewa elimu ila alikuwa ni kijana.”³⁹

Mtume wa Mwenyezi Mungu (s.a.w.w.) amesema: “Enyi wana wa Abdul Muttalib! Hakika wallahi simjui kijana yeyote katika waarabu aliyewaletea watu wake kitu bora kuliko nilichowaletea, kwani hakika mimi nime- waletea kheri ya dunia na Akhera.”⁴⁰

Imam Mahdi (a.s.) atadhihiri akiwa kijana:

Mtume wa Mwenyezi Mungu (s.a.w.w.) amesema: “Mwisho wa zama atasimama mtu kutoka ndani ya kizazi changu akiwa kijana mwenye uso mzuri na pua iliyochongoka, ataijaza ardhi uadilifu na usawa kama itakavyokuwa imejaa dhulma na ujeuri.”⁴¹

Imam Hasan (a.s.) amesema: “Wa tisa kutoka katika kizazi cha ndugu yangu Husayn ni mwana wa bibi wa vijakazi, Mwenyezi Mungu atarefusha umri wake wakati wa ghaiba yake, kisha kwa uwezo wake atamdhihirisha akiwa katika sura ya ujana chini ya miaka arubaini, hilo ni ili Mwenyezi Mungu ajulikane kuwa ni Muweza juu ya kila kitu.”⁴²

Imam As-Sadiq (a.s.) amesema: “Lau angekuwa ametokeza Qaim basi watu wangemkanusha, kwa sababu atarejea kwao akiwa kijana aliyelingana.”⁴³

Imepokewa ndani ya kitabu *Kamalud-Din* kutoka kwa Abu Swalti Al-Harawiy amesema: “Nilimwambia Ar-Ridha (a.s.): Ni zipi alama za Qaim kutoka kwenu pindi atakapodhihiri? Akasema: ‘Alama yake ni kiumri awe mzee lakini ni kijana kimuonekano kiasi kwamba mtazamaji atadhania kuwa ni mtu wa miaka arubaini au chini yake.’⁴⁴

3) Nafasi Ya Vijana Katika Serikali Ya Mtume (S.A.W.W.)

Balozi wa kwanza wa Mtume (s.a.w.w.) ni kijana:

As’ad bin Zarara na Dhak’wan bin Abdu Qaysi walikuja kwa Mtume (s.a.w.w.) Makka kabla ya kuhama kwake, na wao wawili walikuwa mabosi wa Madina, wakaingia kwa Mtume (s.a.w.w.) wakati ambao Makka ilikuwa kipindi kigumu, wakasiliza wito wake, kisha wakasilimu na kumwambia: “Ewe Mtume wa Mwenyezi Mungu! Tupe mtu atakayetu- funza Qur’an na kuwalingania watu katika jambo lako.”⁴⁵

Hii ilikuwa ndio mara ya kwanza Madina ambayo ilikuwa ni mji mkubwa wenye tofauti nyingi kuomba mwakilishi wa Mtume (s.a.w.w.), kama ambavyo ilikuwa ndio mara ya kwanza Mtume (s.a.w.w.) kutuma mwakilishi wake rasmi nje ya Makka, hivyo ilipasa kwa ajili ya jukumu hili zito la hatari amtume mtu mwenye sifa na uwezo unaohitajika. Ndipo Mtume (s.a.w.w.) akamteua Masw’ab bin Umayri, naye alikuwa kijana mwerevu.

Mtume (s.a.w.w.) akampa maelekezo Masw’ab bin Umayri akiwa bado kijana kabisa na akamwamuru aende na As’ad, na Masw’ab alikuwa tayari ameshajifunza sehemu kubwa ya Qur’an.⁴⁶ Akaondoka kijana huyu aliyejaa roho ya imani na ujana, akatekeleza jukumu lake na kusimamia kwa namna nzuri zaidi, haukupita muda mrefu watu wa Madina wakaukubali wito wake bila kujali tofauti zao, na hasa vijana na watoto wao, wakasil- imu na Masw’ab akawaswalisha Swala ya Ijumaa, nayo ndio ya kwanza ya Ijumaa iliyoswaliwa Madina.

Yeye ndiye wa kwanza aliyekusanya watu kwa ajili ya Ijumaa huko Madina, na mikononi mwake wakasilimu Asidu bin Hakhir na Saad bin Muadh. Hilo linatosha kuwa fahari na athari ndani ya Uislamu.⁴⁷

Imepokewa ndani ya kitabu *Biharul-An’war*: “Masw’ab alifikia kwa As’ad bin Zurara, na alikuwa kila siku anatoka na kutembelea vikao vya mak- hazraji akiwalingania waingie kwenye Uislamu, na hapo vijana

wanamkubali.”⁴⁸

Gavana wa kwanza wa Makka ni kijana wa miaka ishirini na moja:

Baada tu ya Mtume (s.a.w.w.) kulikomboa Jiji la Makka zikajitokeza alama za kuja vita vya Hunayni baada ya muda mfupi, hapo Mtume (s.a.w.w.) hakuwa na jingine ila ni kuandaa jeshi lake na kulitenga nje ya Makka ili kujiandaa na mapambano.

Upande mwingine alikuwa analazimika Makka ambayo punde tu ameikomboa kutoka mikononi mwa mushrikina, kuiachia gavana mwenye uwezo wa kuendesha mambo ipasavyo, na hasa ukizingatia wakati huo ilikuwa ndio kituo kikuu cha Bara la Uarabu na ndio mwelekeo wa macho ya makabila na watu wote kwa ujumla, zaidi ya hapo ni kuwa ugavana huu utazuia jaribio lolote la mushrikina la kuvunja amani na uhuru wa Makka.

Hivyo Mtume (s.a.w.w.) akamteua kijana wa miaka ishirini na moja kwa ajili ya jukumu hili zito na la hatari, naye ni Uttab bin Usaydu, akamkabidhi na kumwandikia hati ya ugavana wake: “Mtume (s.a.w.w.) amempa ugavana Uttab bin Usaydu akiwa na umri wa miaka ishirini na moja, amempa utawala wa Makka na amemwamuru awasalisha watu. Naye ndiye gavana wa kwanza anayeswalisha jamaa Makka baada ya ukombozi wa Makka.”⁴⁹

Kisha (s.a.w.w.) akamwelekea Uttab na kumbainishia hatari ya jukumu hili zito akasema: “Ewe Uttab! Unajua nimekupa utawala uwatawale kina nani? Nimekupa utawala uwatawale watu wa Mwenyezi Mungu, na laiti ningejua wana mtu mwenye kheri kuliko wewe basi ningempa awatawale.”⁵⁰

Katika hali ya kawaida ni lazima hati kama hii ingezua dukuduku la watu wa Makka na viongozi wao, ndipo Mtume (s.a.w.w.) akaandika hati ndefu ili kuzuia upinzani wao, mwishoni akasema: “Wala yeyote mwenye hoja miongoni mwenu asimwasi kwa hoja ya udogo wa umri, kwani mkubwa si mbora, bali mbora ndiye mkubwa.”⁵¹ Uttab bin Usayd alibaki kama gavana wa Makka mpaka mwisho wa uhai wa Mtume (s.a.w.w.), na alitawala na kuongoza vizuri.

Kiongozi wa vita vya Rum ni kijana wa miaka kumi na nane:

Mtume (s.a.w.w.) mwishoni mwa uhai wake aliandaa jeshi ili kuupiga utawala wa nchi kubwa ya Rum, wakajiunga na jeshi hili la waislamu sahaba wakubwa na watu maarufu miongoni mwa muhajirina na answari.

Na ni wazi kuwa ilikuwa inapasa jeshi hili aliweke chini ya uongozi wa viongozi wenye uwezo, hivyo akaliiweka chini ya uongozi wa Usama bin Zaydi, na kipindi hicho alikuwa na umri wa miaka kumi na nane.⁵²

Sahaba wakapinga uamuzi huu katika mazingira tete kama hayo,⁵³ wakatoa yaliyomo nyoyoni mwao na kutandaza ndimi zao kwa kusema:

“Hivi kijana huyu anapewa uongozi juu ya muhajirina wa mwanzo?!”⁵⁴ Mtume (s.a.w.w.) alipolisikia hilo alitoka akichechemea mpaka mimbarini akiwa na ghadhabu, baada ya kumuhimidi na kumshukuru Allah akasema:

“Watu wamekosoa uteuzi wa uamiri wa Usama, na tayari walikuwa wamekosoa uteuzi wa uamiri wa baba yake kabla ya hapo, na hakika wao wawili wanafaa kabisa kwa uamiri huo, na wao wawili ni watu niwapendao sana, nawausia kheri kwa Usama.”⁵⁵

Nafasi ya vijana katika serikali ya Imam wa zama zetu:

1. Imam Ali (a.s.) amesema: “Wafuasi wa Mahdi (a.s.) ni vijana, hatokuwa na wazee ila kama wanja ndani ya jicho na chumvi kwenye mahitaji ya safari, na mahitaji machache mno ni chumvi.”⁵⁶

2. Imam As-Sadiq (a.s.) amesema: “Vijana wa Kishi’a watakuwa wamelala juu ya migongo ya mikeka yao, ghafla atawafikia Imam wao ndani ya usiku mmoja bila kutangulia ahadi, kisha wataamka wakiwa Makka.”⁵⁷

-
1. Al-Mawaidh Al-Adadiyyah Uk. 218.
 2. Ghurarul-Hikam: Hadith ya 5764.
 3. Ad-Daywan Al-Mansuub ilal-Imam Ali (a.s.) Uk. 100.
 4. Ad-Daywan Al-Mansuub ilal-Imam Ali (a.s.) Uk. 206.
 5. Man la yahdhuruhul-Faqih Juz. 4 Uk. 357, Hadithi ya 5762. Al-Khiswal Uk.239, Hadithi ya 85.
 6. Tanbihul-Khawatir, Juz. 1, Uk. 131.
 7. Aalamud-Diin, Uk. 333.
 8. Awali Al-Laaly, Juz. 1, Uk. 293, Hadithi ya 180.
 9. Nahjul-Balagha, barua ya 31.
 10. Ghurarul-Hikam, hadithi ya 9689.
 11. Al-Kafiy Juz. 3, Uk. 259, Hadithi ya 30.
 12. Ghurarul-Hikam, Hadithi ya 2501.
 13. Al-Amaali cha As-Saduq Uk. 299, hadithi ya 336.
 14. Al-Khisal Uk. 509, hadithi ya 2.
 15. Tanbihul-Khawatir Juz. 1, Uk. 37.
 16. Iddatud-Daiy Uk. 103.
 17. Biharul-An'war Juz. 70 Uk. 68, hadithi ya 14.
 18. Al-Amaali cha As-Saduq, Uk. 766, hadithi ya 1030.
 19. Sunan At-Tirmidhiy. Juz. 4, Uk. 612, hadithi ya 2416.
 20. Al-Khisal Uk. 253, hadithi ya 125.
 21. Al-Kafiy Juz. 2 Uk. 135, hadithi ya 20.
 22. Shabab Quraysh, Uk. 1.
 23. Tafsir Al-Qummiy, Juz. 2, Uk. 228.
 24. Kanzul-Fawaid, Juz. 1 Uk. 200.
 25. Alimwambia maneno haya Muhammad bin Abdullah bin Hasan (a.s.). Al-Kafiy, Juz. 1, Uk. 362, hadithi ya 17.
 26. Al-Kafiy, Juz. 8, Uk. 93, hadithi ya 66.
 27. Ilalus-Sharaiu Uk. 54, hadithi ya 1.
 28. An-Nawadir cha Ar-Rawandiy Uk. 132, hadithi ya 169.

29. Sharhu Nahjul-Balagha, Juz. 20, Uk. 267, hadithi ya 98.
30. Ghurarul-Hikam, hadithi ya 8272.
31. Sharhu Nahjul-Balagha, Juz. 20, Uk. 285, hadithi ya 260.
32. Ad-Duru An-Nadhim fi manaqibil-Aimmatil-Lahamiym, Uk. 587.
33. Al-Amaal cha Tus Uk. 303, hadithi ya 604.
34. Nahjul-Balagha, barua ya 31.
35. Nahjul-Balagha, barua ya 31.
36. Maanul-Akhbar Uk. 366.
37. Maanul-Akhbar, Uk. 226.
38. Kanzul-Umal, Uk. 11 Uk. 475, hadithi ya 32233.
39. Al-Firdawsu, Juz. 4, Uk. 82, hadithi ya 6254.
40. Al-Amaali cha Tus Uk. 583, hadithi ya 1206.
41. Uqad-Durar, Uk. 39.
42. Kamalud-Din Uk. 316, hadithi ya 2.
43. Biharul-An'war, Juz. 3 Uk. 301.
44. Kamalud-Din, Uk. 652, hadithi ya 12.
45. Biharul-An'war, Juz. 19, Uk. 10
46. Bihar ul-An'war: Juz. 19, Uk. 10.
47. Usudul-Ghaba Juz. 5, Uk. 176, Namba 4936
48. Biharul-An'war, Juz. 19, Uk. 10.
49. As-Siratul-Halbiyah, Juz. 3, Uk. 104.
50. Usudul-Ghaba, Juz. 3, Uk. 549, hadithi ya 20.
51. Biharul-An'war, Juz. 21, Uk. 123, hadithi ya 20.
52. At-Tabaqatul-Kubra, Juz. 4, Uk. 66.
53. Mawsuatul-Imam Ali bin Abi Talib, Juz. 2, Uk. 195 – 401.
54. At-Tabaqatul-Kubra, Juz. 2, Uk. 190.
55. At-Tabaqatul-Kubra, Juz. 2, Uk. 249. Sahih Bukhari, Juz. 3, Uk. 1365, hadithi ya 3524.
56. Al-Ghaybah cha Tus Uk. 476, hadithi ya 501.
57. Al-Ghaybah cha An-Nuumaniy Uk. 316, hadithi ya 11.

Source URL:

<https://www.al-islam.org/sw/johari-za-hekima-kwa-vijana-muhammad-reyshahri/sehemu-ya-kwanza>